

L'agricultura sa prepara per las sfidas da damaun

Il Cussegl federal ha preschentà il messadi per la politica agrara 2020

DA MARTIN CABALZAR/FMR

■ **Dacurt ha il Cussegl federal preschentà il messadi per la cuntinuaziun da la poliitca agrara a partir da 2022. Las reacziuns sin las propostas fatgas èn cuntradictorias.** Sco quai ch'ìl Cussegl federal accentuescha en ses messadi tschentan las midadas da l'ambient e cunzunt la midada dal clima, il svilup tecnologic sco era las aspectativas da la societad l'agricultura e l'economia da nutriment avant novas sfidas. Perquai saja necessari d'adattar periodicamain las cundiziuns da rom da la politica agrara, argumentescha il Cussegl federal.

Previs è d'augmentar l'efficienza dals manaschis, reducir la contaminaziun da l'ambient e reducir l'adiever da la resursas betg regenerablas. La summa totala ch'ìl Cussegl federal vul metter a disposiziun per pajaments directs munta a 13,774 milliardas.

Resguardà l'iniziativa da l'aua da baiver

Il messadi cuntegna er in pachet da mesiras sco alternativa a l'iniziativa da l'aua

da baiver. Prevesida è tant ina reducziun da las sperdidas da qualitat sco era dals pesticids. Plinavant è planisada ina reducziun dal quantum maximal da puschina che po vegnir utilisada per hectara. L'attest da producziun ecologica vegn sviluppà vinavant per uschia pudair cuntanscher las finamiras ecologicas. Tranter auter vegn limità il dumber dals products lubids ed engrevgiadas las pretensiuns per reducir las emissiuns en flums e biotops. Mesiras ecologicas vegnan indemnisadas supplementarmain cun pajaments directs. Las reducziuns da las emissiuns dal gas da serra vegnan fixadas sco tar autras branschas en in'ordinaziun separada. Las organisaziuns da la branscha duain surpigliar la responsabladad per la reducziun da nitrogen e fosfor. Na vegnan las finamiras stipuladas betg cuntanschidas vegn la Confederaziun a prender mesiras supplementaras.

Il Cussegl federal sustegna las intenziuns da la cumissiun dal Cussegl dals chantuns per proteger l'aua da baiver cun reducir ils meds per proteger las plantas ed ils biozids per la mesadad fin l'onn 2027.



La politica agrara 2022plus vul tegnair quint dals basegns da l'entira populaziun. SOMEDIA

Adattaziun dals pajaments directs

Per preparar meglier ils purs sin las sfidas futuras en connex cun ils pajaments directs duain las pretensiuns da lur furmaziun vegnir augmentadas. Plinavant è planisà da plafunar ils pajaments directs cun ina reducziun dals pajaments per manaschis purils che retrain pajaments da passa 150 000 francs annualmain. En

il sector dal meglierament da las structurazions è planisà da conceder credits d'investiziun per l'acquist da terren agricolt, per tecnologias innovativas per reducir effects nuschaivels per l'ambient sco er per promover la sanadad ed il bainstar dals animals.

Tut en tut duain star a disposiziun per ils onns 2022 fin 2025 13,774 milliardas

per l'agricultura. Quai correspunda presapauca a la summa dals ultims trais onns. Da quella summa vegnan 11,09 milliardas impundidas per pajaments directs, 2,119 milliardas per producziun e vendita e 565 milliuns per la basa da producziun.

Meglierar il status da la partenaria

Sco quai ch'ìl Cussegl federal accentuescha surpiglia l'agricultura tar ils pajaments directs ina rolla da pionier damai ch'ella preveda ina segirtad sociala per las partenarias resp. per ils partenaris che lavuran en il manaschi. In meglierament en quest regard preveda era la revisiun prevedida dal dretg funsil puril. Il messadi cuntegna era la pussevladad che la Confederaziun sa participass durant otg onns a las premias d'assicuranza per perditas da racolta en cas da malaure. La Confederaziun è plinavant pronta da sustegnair raits da cumpetenza ed innovaziun sco era projects da pilot e da demonstraziun, tschertgond uschia da colliar perscrutaziun, furmaziun e cussegliaziun.

Ulteriuras infurmaziuns: www.blw.admin.ch